

# Rialacha chomórtas ImagineEU

Trí pháirt a ghlacadh sa chomórtas seo, aontaíonn tú leis na Rialacha Comórtais seo a leanas.

Ní thabharfar aird ar iarratais nach gcomhlíonann na ceanglais seo.

Is é Netcompany-Intrasoft (Bainisteoir an Chomórtais) a bhainistíonn an comórtas thar ceann an Choimisiúin Eorpaigh agus faoi chonradh ag an gCoimisiún (Ardrúnaíocht, Aonad A.1 – Tosaíochtaí Beartais & Clár Oibre).

## Cad leis a mbaineann an comórtas seo?

Sa chomórtas seo iarrtar ar **dhaltaí atá sa dá bhliain dheireanacha den mheánoideachas ó thíortha uile an Aontais, faoi mhaoirseacht múinteora, gearrfhíseán** a chruthú agus a chomhroinnt faoi **smaoineamh praiticiúil atá acu le feabhas a chur ar a bpobal féin** agus gníomhaíocht a mholadh ba mhaith leo an tAontas Eorpach a dhéanamh. Ba cheart aghaidh a thabhairt san fhíseán ar ábhar a thagann faoi cheann amháin de [réimsí inniúlachta an Aontais Eorpaigh](#) – mar is amhlaidh i gcás na dtionscnamh Eorpach ó na saoránaigh.

Ba cheart ábhair imní agus smaointí na ndaltaí a chur in iúl leis an teachtaireacht san fhíseán. Ba cheart an mhórtheachttaireacht a bheith soiléir, agus ba cheart an gníomhaíocht a bheartaítear a bheith ábhartha do thíortha uile an Aontais.

Tá an comórtas seo ag cur le coincheap an **Tionscnaimh Eorpaigh ó na Saoránaigh**, uirlis thábhachtach de chuid an daonlathais rannpháirtíochta san Aontas, a thugann deis do shaoránaigh páirt ghníomhach a ghlacadh i gceapadh beartais an Aontais. Is féidir an comórtas a chomhcheangal le húsáid na [Uirlisí Oideachasúla do Scoileanna](#), rud a thabharfadh deis do na daltaí tuilleadh eolais a fháil faoin Aontas agus faoin dóigh ar féidir leo a bheith ina saoránaigh ghníomhacha leis an Tionscnamh Eorpach ó na Saoránaigh.

NB. Ba cheart a thabhairt faoi deara nach ionann an comórtas agus an próiseas oifigiúil chun tús a chur le tionscnamh Eorpach ó na saoránaigh.

## Cé atá in ann páirt a ghlacadh?

Ba cheart na físeáin a fhorbairt agus a léiriú i ngrúpaí de suas le **seachtar daltaí sa dá bhliain dheireanacha den mheánoideachas** ón scoil chéanna, **faoi mhaoirseacht aon mhúinteora amháin nó beirt mhúinteoirí ón scoil chéanna**.

## Incháilitheacht

### Ginearálta

1. San áireamh sna scoileanna incháilithe tá scoileanna poiblí agus scoileanna príobháideacha nó aon scoil eile a aithnítear go hoifigiúil agus a chuireann oideachas dara leibhéal ar fáil.

2. Ba cheart na scoileanna rannpháirteacha a bheith **Ionaithe i mBallstát den Aontas**: an Bheilg, an Bhulgáir, an Chipir, an Chróit, an Danmhairg, an Eastóin, Éire, an Fhionlainn, an Fhrainc, an Ghearmáin, an Ghréig, an Iodáil, an Ísiltír, an Laitvia, an Liotuáin, Lucsamburg, Málta, an Ostair, an Pholainn, an Phortaingéil, an Rómáin, an tSeicia, an tSlóivéin, an tSlóvaic, an Spáinn, an tSualainn agus an Ungáir.
3. Is féidir le roinnt grúpaí daltaí ón scoil chéanna cur isteach ar an gcomórtas ach **níor cheart do dhalta a bheith ina bhall de níos mó ná grúpa amháin**. Ba cheart na daltaí sna foirne a bheith sa scoil chéanna, ach ní gá gur ón rang céanna a bheidís.
4. Ní cheadaítear ach **aon fhíseán amháin** in aghaidh na foirne a chur isteach.
5. Is é an **múinteoir maoirseachta amháin a fhéadfaidh na físeáin a chur isteach**.
6. Ba cheart do na daltaí rannpháirteacha an **Ráiteas Príobháideachais a léamh agus a dtoiliú a thabhairt** gur féidir iad a thairfeadh agus a dtoiliú a thabhairt páirt a ghlacadh sa chomórtas tríd an bh **Foirm Údaraithe** a shíniú. Ní mór do thuismitheoirí nó do chaomhnóirí dlíthiúla na ndaltaí an Fhoirm Údaraithe a shíniú freisin.

### Ábhar na bhfíseán

1. Ní thabharfar aird ar fhíseáin nach bhfuil ábhartha do théama an chomórtais nó a chomhroinntear trí chainéal nach ceann de na cainéil a shonraítear don chomórtas seo é (YouTube nó Vimeo). San fhoirm iarratais roghnaigh ón liosta an réimse nó na réimsí inniúlachta de chuid an Aontais a ndéanann an físeán tagairt dó nó dóibh.
2. Níor cheart daoine seachas na daltaí atá ag glacadh páirt sa chomórtas a bheith le feiceáil sna físeáin.
3. Diúltófar d'fhíseáin a bhfuil **ábhar do-ghlactha** iontu. I measc na bhforas do dhiúltú tá na cinn seo a leanas ach ní hiad na forais sin amháin atá ann: sárú ar chearta tríú páirtí, caint mhaslach, íomhánna gáirsiúla nó míchuí, ábhar atá idirdhealaitheach nó gríosaitheach do ghrúpaí nó do dhaoine aonair, ábhar a nochtann eolas pearsanta nach bhfuil gá léi, chomh maith le físeáin neamhiomlána. Ba cheart an t-ábhar a bheith i gcomhréir le (i) luachanna an Aontais, mar a leagtar amach iad in [Airteagal 2 den Chonradh ar an Aontas Eorpach](#) agus le (ii) na cearta a dtugtar tuairisc orthu i gCairt um Chearta Bunúsacha an Aontais Eorpaigh.
4. Is féidir físeáin a léiriú agus a chur isteach in aon cheann de theangacha oifigiúla an Aontais agus is gá tras-scríbhinn atá aistrithe go Béarla ag chur in éineacht leo. Is féidir fotheidil i mBéarla a chur leo freisin, ach níl siad riachtanach.

### Formáid na bhfíseán

1. Ba cheart na físeáin a uaslódáil go YouTube nó Vimeo. Is iad na formáidí físeáin a mholtar don uaslódáil **.mov nó .mp4**.
2. Ní mór an nasc YouTube/Vimeo chuig d'fhíseán a chur san fhoirm iarratais.
3. Ná bíodh an físeán níos faide ná 3 nóiméad.
4. Moltar na físeáin a scannánú i bhformáid tírdhreacha (treoraíocht chothrománach). Ní mór na físeáin a thairfeadh le gléas ardcháilíochta (ceamara nó fón póca), ionas go mbeidh an fhuaim ar ardchaighdeán.

## Cóipcheart

Ní mór gach fhíseán a bheith ina bhunsaothar, agus ba cheart na rannpháirtithe a bheith ina n-úinéirí aonair nó ba cheart na cóipchirt a bheith aistrithe chucu. Moltar do na rannpháirtithe ábhair atá saor ó chóipcheart a úsáid.

Ba cheart do na rannpháirtithe bunchomhad digiteach a bhfíseáin a choinneáil, toisc go bhféadfaí iarraidh orthu a chruthú gurb iad úinéirí an tsaothair iad. D'fhéadfaí iarraidh ar iarrthóirí an chomórtais eolas breise a chur ar fáil.

## Foirm Údaraithe

Is féidir an [Fhoirm Údaraithe](#) a íoslódáil ó leathanach an chomórtais in aon cheann de 24 theanga oifigiúla an Aontais. Ní mór í a líonadh isteach, a shíniú agus a chur isteach (mar chomhad scanta nó mar ghrianghraf) mar chuid den iarratas le haghaidh gach dalta atá ag glacadh páirt sa chomórtas. Mura ndéanann daltaí amhlaidh, beidh an t-iarratas neamh-incháilithe.

**Ní mór do gach dalta atá le feiceáil san fhíseán agus dá dtuismitheoirí nó dá gcaomhnóirí dlíthiúla an Fhoirm Údaraithe a líonadh isteach agus a shíniú.** Ba cheart an oiread céanna foirmeacha údaraithe a chur leis an iarratas agus atá daltaí le feiceáil san fhíseán.

**Mura gcuirtear na foirmeacha údaraithe uile isteach agus iad líonta isteach i gceart, beidh an t-iarratas neamh-incháilithe.**

## An Fhoirm Iarratais a chur isteach

Ba cheart don mhúinteoir maoirseachta an [fhoirm iarratais atá á hóstáil ar Fhóram an Tionscnaimh Eorpaigh ó na Saoránaigh](#) a líonadh isteach. **Ba cheart don iarratasóir logáil isteach ar sheirbhís fíordheimhniúcháin úsáideora an Choimisiúin Eorpaigh ar a dtugtar 'EU Login',** ar shuíomh gréasáin Fhóram an Tionscnaimh Eorpaigh ó na Saoránaigh. Tá an Fhoirm Iarratais ar fáil i ngach ceann de 24 theanga oifigiúla an Aontais Eorpaigh.

Is féidir iarratais a chur isteach go dtí an 13 Nollaig 2023 (24:00, am lár na hEorpa). Ní thabharfar aird ar iarratais a chuirtear isteach tar éis an sprioc-ama sin.

Ní mór gach roinn den Fhoirm Iarratais a líonadh isteach le go mbeidh an t-iarratas incháilithe.

Tá na gnéithe seo a leanas san áireamh san fhoirm iarratais:

- Eolas faoin mhúinteoir maoirseachta (iarratasóir): ainm, seoladh ríomhphoist, uimhir theileafóin, ainm na scoile agus tír.
- Eolas faoin dalta: céadainm agus sloinne, foirmeacha údaraithe le haghaidh gach dalta atá ag glacadh páirte (suas le seachtar), iad líonta isteach agus sínithe go cuí.
- Eolas faoin bhfíseán: an nasc URL mar a uaslódáladh go YouTube nó Vimeo é, teideal an fhíseáin, cur síos gairid (500 carachtar ar a mhéid), teanga an

fhíseáin (as 24 theanga oifigiúla an Aontais), agus tras-scríbhinn aistrithe go Béarla.

- An réimse nó na réimsí inniúlachta de chuid an Aontais faoina dtiteann coincheap an fhíseáin.

**Mura líontar an fhoirm iarratais isteach i gceart, beidh an t-iarratas neamh-incháilithe.**

### **Meastóireacht ar na hiarratais**

Is é Bainisteoir an Chomórtais, agus é ag obair faoi chonradh ag an gCoimisiún Eorpach, a dhéanfaidh measúnú ar incháilitheacht na n-iarratas. Ina dhiaidh sin déanfaidh an Bainisteoir na físeáin a sheiceáil agus na cinn atá incháilithe a uaslódáil agus a chur ar fáil don vótáil phoiblí. Nuair a bheidh an tréimhse vótála thart, déanfaidh giúiré a bheidh comhdhéanta d'oifigigh de chuid an Aontais agus ionadaithe ó eagraíochtaí de chuid na sochaí sibhialta measúnú ar na deich bhfíseán is mó vótaí ó thaobh ábharthachta, soiléireachta, úrnuaigh, agus cruthaitheachta de chun na trí fhoireann bhuaiteacha a chinneadh.

Cuirfear na critéir seo a leanas san áireamh agus meastóireacht á dhéanamh ar na físeáin:

- Ábharthacht don Tionscnamh Eorpach ó na Saoránaigh (0-25 pointe): An bhfuil an smaoineamh taobh thiar den fhíseán ábhartha mar théama do thionscnamh Eorpach ó na saoránaigh?
- Soiléireacht (0-50 pointe): An bhfuil an teachtaireacht soiléir agus gonta?
- Cruthaitheacht (0-25 pointe): An smaoineamh úrnua é? An dtugann an fhoireann aghaidh ar an smaoineamh ar bhealach suimiúil? An úsáideann siad gnéithe nó tréithe a tharraingíonn aird an lucht féachana?

Ní mór do na hiarratasóirí 60 pointe ar an iomlán a bhaint amach chun bheith incháilithe don duais. Cuirfear an fhoireann nó na foirne a bhuann an comórtas ar an eolas trí shonraí teagmhála an mhúinteora atá ar an bhfoirm iarratais faoin 20 Feabhra 2024. Déanfar na buaiteoirí a fhógairt ar leathanach gréasáin an Tionscnaimh Eorpaigh ó na Saoránaigh agus ar chainéil oifigiúla eile de chuid an Choimisiúin Eorpaigh.

Forchoimeádan eagraithe an chomórtais an ceart teagmháil a dhéanamh leis na scoileanna rannpháirteacha le linn an phróisis meastóireachta chun sonraí a bhaineann leis an iarratas a shoiléiriú.

### **Duais: Turas staidéar chun na Bruiséile**

Bronnfar turas staidéar chun na Bruiséile, atá beartaithe don 21-23 Márta 2024, ar na trí fhoireann a bhuann an comórtas – beidh gach foireann comhdhéanta de suas le seachtar daltaí agus suas le beirt mhúinteoirí. Le linn an turais beidh an deis ag na daltaí casadh le hionadaithe ó na hInstitiúidí Eorpacha chun tuilleadh eolais a fháil faoin gcaoi a gceaptar beartais agus dlíthe an Aontais agus faoin gcaoi ar féidir leo páirt a ghlacadh sa Tionscnamh Eorpach ó na Saoránaigh.

Cumhdaíonn an duais speansais taistil na foirne idir an áit a bhfuil an scoil lonnaithe sa Bhallstát agus an Bhruiséil, aisíocaíocht na gcostas lóistín ar feadh dhá oíche agus liúntas laethúil chun costais eile a chlúdach (thart ar €113 an duine in aghaidh an lae), de réir rialacha an Choimisiúin Eorpaigh maidir le speansais taistil a chlúdach.

Beidh ar na foirne a bhuann an comórtas, a bheidh comhdhéanta de suas le seachtar daltaí agus suas le beirt mhúinteoirí, a speansais lóistín féin a íoc agus aisíocfar iad laistigh de 30 lá tar éis an turais. Chun na críche sin, beidh ar gach rannpháirtí nó institiúid a chumhdaigh na costais an fhoirm faisnéise cuntas bainc líonta, a dticéid agus a bpassanna bordála a chur isteach agus an fhoirm aiseolais a líonadh isteach freisin. Déanfar teagmháil leis na foirne a bhuann an comórtas maidir le socruithe taistil.

Tabharfar cuireadh do na foirne a bhuann an comórtas clár eagraithe a leanúint le linn a dturais.

Déanfar físeáin na bhfoirne a bhuann an comórtas a chur chun cinn ar chainéil oifigiúla an Choimisiúin Eorpaigh agus fotheidil i mBéarla curtha leo. Cuirfear sainaitheantas físeach an Tionscnaimh Eorpaigh ó na Saoránaigh leis na físeáin agus iad á bhfoilsíú.

## **Séanadh**

Ní féidir na heagraithe a chur faoi dhliteanas i gcás ar bith as aon timpiste, costas, damáiste díreach nó indíreach a d'fhéadfadh tarlú mar gheall ar rannpháirtíocht sa chomórtas seo. Ní féidir na heagraithe a chur faoi dhliteanas i gcás ar bith as an gcomórtas a bheith curtha ar ceal, curtha ar athlá, nó leasaithe mar gheall ar imthosca gan choinne. Féadfaidh na dátaí a luaitear athrú ar chúiseanna eagrúcháin nó mar gheall ar imthosca gan choinne.

Ní bheidh na heagraithe faoi dhliteanas i gcás ar bith as aon mhoill, athrú, suaitheadh, cealú, atreorú nó ionadú, as an duais nó na duaiseanna gan a bheith ar fáil mar gheall ar laethanta saoire poiblí áitiúla nó dálaí eile a d'fhágfadh nach mbeadh an duais nó na duaiseanna ar fáil. Ní bheidh an conraitheoir faoi dhliteanas i leith a n-oibleagáidí gan a bheith curtha i gcrích mar gheall ar phaindéim, tubaiste nádúrtha, ordú nó rialachán rialtais, nó aon chúis eile nach bhfuil aon neart acu uirthi.

Forchoimeádann na heagraithe an ceart an comórtas seo a mhodhnú nó deireadh a chur leis, go sealadach nó go buan, tráth ar bith, gan fógra roimh ré a thabhairt do na rannpháirtithe.

**Go raibh maith agat as páirt a ghlacadh agus go n-éirí leat!**

**[Eolas ginearálta faoi chomórtas físeán ImagineEU](#)**

## **Treoirínte maidir le físeán a dhéanamh**

### **Taifeadadh: Buncheanglais theicniúla**

- moltar 720p, 1080p nó 4K | 25fps, 30fps nó 60fps
- Formáid tírdhreacha (cas d'fhón ar a thaobh) (molta)

- suas le 3 nóiméad ar fad
- .mp4 nó .mov
- 

### **Taifeadadh: Noda teicniúla**

- Soilsiú: Is fearr solas nádúrtha ó fhuinneog. Is fearr i gcónaí a bheith os comhair d'fhoinsé solais seachas é a bheith ar do chúl, rud a chruthaíonn scáthanna.
- Fuaim: Seachain timpeallachtaí atá an-torannach nó gaofar. Bain úsáid as micreafón Bluetooth/seachtrach agus é nasctha leis an bhfón nó leis an gceamara, más féidir é.
- Cúlra: Roghnaigh cúlra simplí gan rud ar bith a chuirfeadh isteach ar an radharc. Coinnigh fad idir tú féin agus an cúlra chun é a dhéanamh chomh doiléir agus is féidir.
- Iarr cuidiú: Lig do dhuine éigin d'fhón cliste a choinneáil duit ionas gur féidir leat an príomhlionsa a úsáid in áit an lionsa féinín.

### **Cineál ceamara a mholtar**

- Ceamara DSLR nó ceamara gan scáthán
- Ceamara fóin a mholtar: iPhone 11 nó os a chionn, Samsung Galaxy ardleibhéil, nó fón atá cosúil leo.
- Trealamh breise: Is féidir tríchosach, maide féinín, giombal nó micreafón a úsáid chun feabhas a chur ar do théiceanna agus iad a dhéanamh níos socra, ach níl gá leo.
- Eagarthóireacht físeáin: Ar Microsoft Windows is féidir Windows Movie Maker a úsáid, agus ar macOS tá iMovie ar fáil, cuireann GoPro feidhmchlár ar fáil darb ainm QuickApp lenar féidir na bunrudaí a dhéanamh, cuireann Adobe an feidhmchlár Premiere ar fáil, cuireann Apple an feidhmchlár Final Cut ar fáil, agus cuireann DaVinci an feidhmchlár Blackmagic ar fáil le haghaidh úsáid ghairmiúil.

Más rud é gur mian leat fotheidil i mBéarla a chur le d'fhíseán, is féidir leat na bogearraí [Adobe Premiere](#) nó [Final Cut Pro](#) a úsáid.

### **Ceol**

Má úsáideann tú ceol, molaimid duit ceol atá saor ó chóipcheart a úsáid. Má bhíonn amhras ort, ceadaigh [Creative Commons](#) le cinntiú nach bhfuil tú ag briseadh an dlí.

### **Comhaontú ceadúnais**

Le cinntiú gur féidir linn d'fhíseán a fhoilsiú ar ár gcainéil ar na meáin shóisialta agus ar ár suíomhanna gréasáin, dearbhaíonn tú go bhfuil gach cóipcheart glanta agat, cearta ceoil san áireamh.

### **Príobháideacht sonraí**

Tríd an bhFoirm Údaraithe a shíniú, dearbhaíonn gach duine atá le feiceáil san fhíseán gur cuireadh ar an eolas iad faoi chuspóirí an fhíseáin, faoin áit a bhfoilseofar é, agus faoina gcearta príobháideachais sonraí mar a leagtar amach sa Ráiteas Príobháideachais iad.

## **Eolas breise**

Bíodh teideal agus creidiúintí san fhíseán féin maidir le gach eolas, íomhá, fuaim nó gearrthóg físe nach leatsa iad. Ní mór tagairt chuí a dhéanamh do gach eolas a chuirtear i láthair san fhíseán, chun sonraí na foinse bunaidh a thabhairt.

Bain úsáid as íomhánna, píosaí scannáin agus ceol atá saor ó chóipcheart nó atá san fhearann poiblí.

Ní cheadaítear físeáin a chur isteach a fheidhmíonn ar bhealach ar bith mar fhógraíocht do tháirge, do pháirtí polaitíochta nó do chuideachta.

## **Teanga**

Is féidir físeáin a chruthú in aon cheann de theangacha an Aontais agus is féidir iad a chur isteach le fotheidil nó gan iad.

Ní mór tras-scríbhinn atá aistrithe go Béarla a bheith ag gabháil leo, mar a iarrtar san Fhoirm Iarratais.

## **Teagmháil**

[eci\\_team@eutaketheinitiative.eu](mailto:eci_team@eutaketheinitiative.eu)